

Supervizor za Brčko odobrila trošenje sredstava za infrastrukturu, škole i stambene objekte u Distriktu

Danas je supervizor za Brčko, Susan R. Johnson, izdala Nalog kojim ovlašćuje Vladu Distrikta da bez zvaničnog odobrenja Skupštine Distrikta utroši sredstva iz budžeta za 2004.god. za održavanje, izgradnju i rekonstrukciju komunalne i ostale infrastrukture, škola i stambenih objekata.

Donošenje Naloga je bilo potrebno jer Skupština Distrikta nije bila u stanju da postigne konačni dogovor o raspodjeli raspoloživih budžetskih sredstava za ove potrebe. Svako dodatno odlaganje u sadašnjoj fazi građevinske sezone bi dovelo u pitanje blagovremenu realizaciju projekata koji su u interesu građana Distrikta i koji treba da zadovolje njihove legitimne zahtjeve.

Supervizor smatra da je pristup Skupštine rješavanju ovih pitanja po prevashodno nacionaloj osnovi neprihvatljiv i nepraktičan. "Politizacija ovih pitanja ima za posljedicu uskraćivanje sredstava koja su prijeko potrebna kako bi se poboljšala infrastruktura i stimulisala privreda", rekla je supervizor. "Raspoloživa sredstva, prikupljena od poreskih obveznika, se istima ne vraćaju blagovremeno kroz usluge, zapošljavanje, plate i socijalne doprinose".

Supervizor je takođe ustanovila da neuspjeh u donošenju odluka o raspodjeli budžetskih sredstava ukazuje na sistemske nedostatke u načinu na koji Vlada i Skupština organizuju i obavljaju svoje dužnosti. Ona je pozvala Vladu i Skupštinu da na bolji način definišu svoje uloge i unaprijede postupke i procedure. Sadašnja interakcija Vlade i Skupštine je nije

dovoljno jasna i transparentna.

Pored toga, supervizor apeluje na Vladu da povede računa o stanovnicima koji do sada nisu primili nikakvu pomoć u rekonstrukciji ili izgradnji. Situacija u kojoj se nalaze lica koja trenutno žive u alternativnom smještaju posebno zahtijeva brzo rješavanje.